

TEZAU LITURGIC
7 OCTOMBRIE

ACATISTUL
SF. CUVIOS
SERGHIE
DE LA NURMA



MOSCOVA, 2000



Акафист

святому преподобному Сергию

Нуромскому, Вологодскому

чудотворцу

Кондак 1

Избранный угодниче Христов, преподобне отче Сергие, благохвальная пения о великих твоих чудесех приносяще ти молитвенницы твои, прославляем прославльшагося в тебе Бога нашего. Ты же, яко имеяй велие дерзновение к Нему, от всяких нас временных и вечных бед твоими к Нему молитвами свободи, да зовем ти:

Радуйся, Сергие преподобне, Нуромский чудотворче.

Икос 1

Ангел земный и человек небесный был еси, преподобне отче Сергие: от юности бо твоя Господеви работати изволивый, достигл еси блаженства небеснаго, и ныне со ангелы Престолу Пресвятыя Троицы предстоиши. Сего

ради тебе, на небеси и на земли прославленному,
вопием сице:

Радуйся, от юности твояе всем сердцем твоим
Господа возлюбивый.

Радуйся, и сам от Него возлюблен бывый.

Радуйся, поучавыйся в Законе Господни день
и ночь.

Радуйся, поучением сим яко древо
плодоносное, при исходящих вод благодатных
насажденное, показавыйся.

Радуйся, чистоты вместилище.

Радуйся, доме всяческаго святыни.

Радуйся, благодати Божия во вся дни жития
исполненный.

Радуйся, наследниче небесных дарований.

Радуйся, Сергие преподобне, Нуромский
чудотворче.

Кондак 2

Видев, преподобне отче, яко вся, яже в мире,
суетна суть и скорогибнуща, изволил еси
всеусердное твое попечение имети о еже како
спасти душу твою. Мы же, о таком твоем

спасительном произволении прославляюще Бога, зовем Ему: Аллилуиа.

Икос 2

Разум божественный имея и теплейшее ко Господу произволение, познал еси, преподобне, яко благо есть человеку, иже возмет ярем Господень на ся от юности своея, и сего ради, отвергся мира, был еси монах. Темже зовем ти:

Радуйся, иго крестоношения Христова возлюбивый.

Радуйся, вослед Господа твоего неленостно устремивыйся.

Радуйся, руку твою на рало спасения возложивый, никогдаже вспять обращаяся.

Радуйся, задняя забывая, в предняя усердно простиравыйся.

Радуйся, благодушным терпением скорбей обители небесныя достигнувый.

Радуйся, ныне о всех в печалех сущих молитвенниче теплейший.

Радуйся, скорбящих скорое утешение.

Радуйся, унывающих утешителю благодатный.

Радуйся, Сергие преподобне, Нуромский чудотворче.

Кондак 3

Сила Вышняго осени тя, преподобне, и препояса тя на враги видимыя и невидимыя, ихже победив, утвердил еси на камени недвижимем заповедей Христовых мысленныя нозе твои, и вшед в небесныя обители, радостно зовещи Богу: Аллилуиа.

Икос 3

Имея в сердце твоём всесовершенное желание работати Господеви со страхом и радоватися Ему со трепетом, оставил еси Отечество твое и пришел еси в гору Афонскую, идеже со отъятием власов главы твоея, отложил еси ветхаго своего человека со страстьми и похотьми его. Темже прими от нас пения сицевая:

Радуйся, рабе Божий, благий и верный.

Радуйся, ниву душевную твою неленостно возделавый.

Радуйся, горы Афонския всельниче.

Радуйся, добродетелей отец преподобных
горы тоя, прежде тебе бывших, сонаследниче.

Радуйся, монахом богодухновенное светило.

Радуйся, ко граду небесному всех путевождю
благонадежный.

Радуйся, пустынножителей украшение.

Радуйся, безмолвия рачителю теплейший.

Радуйся, Сергие преподобне, Нуромский
чудотворче.

Кондак 4

Бурю многомятежнаго мира страстей
возненавидев, отче, устранился еси всех его
красот: в пустыню же вселься, преподобне,
Крестителю в житии последовал еси, и Илии
поревновал еси пророку. Ныне убо истинно
вечную в Небесных дворех получив славу, с
ними предстоиши Богу, поя Тому: Аллилуиа.

Икос 4

Слышав, яко богохранимей державе
Российстей возсия светозарное светило великий
авво Сергей, восхотел еси ученик его быти, и
сего ради оставль гору Афонскую, устремился
еси к царствующему граду Москве, да

возможеши желание твое исполнити. Мы же, мысленно ты на пути сем сретающе, зовем:

Радуйся, смирения благаго ревнителю.

Радуйся, мудрости духовныя искателю неусыпный.

Радуйся, иноче благоискусный.

Радуйся, странниче богоизбранный.

Радуйся, сподвижник соименному ти великому Сергию быти сподобивыйся.

Радуйся, от него вселюбезно приятый.

Радуйся, великаго учителя освященный учениче.

Радуйся, сообитателю его на небесех.

Радуйся, Сергие преподобне, Нуромский чудотворче.

Кондак 5

Боготечней звезде подобяся, якоже елень на источники водныя, сие ты, преподобне, потекл еси в пределы Вологодския, иский безмолвия. Достиг же пустыни Нуромския и ту водрузив Крест Христов, воспел еси Ему благодарственно: Аллилуиа.

Икос 5

Видевше тя преподобне отче, единого на едине Господеви в пустыни работающа, и мневше у тебе обрести многая вещественная сокровища, люте нападоша на тя разбойницы, от нихже и раны многи подъял еси, но абие Христос исцели тя. Сего ради мы взываем ти таковая:

Радуйся, крине райскаго прозябения, во удолиих Нуромских произрастый.

Радуйся, пустыни Вологодския цвете благоуханный.

Радуйся, мучеников сопричастниче.

Радуйся, Господеви твоему незлобием уподобивыйся.

Радуйся, нищетою твоею богат бывый.

Радуйся, смирением твоим Христови подражавый.

Радуйся, пустыни благодатное украшение.

Радуйся, миру светильниче пресветлый.

Радуйся, Сергие преподобне, Нуромский чудотворче.

Кондак 6

Проповедует данную ти от Бога благодать
целебную человек множество: расслабленныя бо
исцеляеши, недугующым, ума лишенным и
бесным здравие подаваеши, слепыя
просвещаеши и хромыя твориши ходити.
Прославляюще убо обильную благодать в тебе
обитающую, благоговейне вопием Богу:
Аллилуиа.

Икос 6

Воссиял еси яко звезда пресветлая от Афона
и от обители великаго тезоименитаго тебе отца
северней стране сей, святе Сергие: бесовстии же
полцы, не терпяще тя в пустыни, множицею
устрашити тя устремляхуся, но обаче, силою
молитв твоих прогоняеми, бежаша. От ихже
наветов и нас избави молитвами твоими, да
зовем ти сице:

Радуйся, бесом страшный прогонителю.

Радуйся, прелести их потребителю.

Радуйся, главу змиеву уязвивый молитвами
твоими.

Радуйся, коварства врагов спасения нашего
ни во что же обращающа.

Радуйся, воине Христов непобедимый.

Радуйся, духи лукавствия смиренномудрием покоривый.

Радуйся, верным на враги пособствуяй.

Радуйся, усердно к заступлению твоему притекающим во брани мысленней скоро помогай.

Радуйся, Сергие преподобне, Нуромский чудотворче.

Кондак 7

Хотящу ти, преподобне, единому в безмолвии житие твое скончати, Господь устроит тя пастыря и учителя монашескому собору: совокупив бо иноков лики и воздвиг храм Спасу Христу, неленостно Ему поработал еси, во дни и в нощи со ученики твоими зовый: Аллилуиа.

Икос 7

Новый воистинну победоносец на плотския страсти явился еси, преподобне: и кто возможет воспети борения твоя, исчести труды, болезни и подвиги, в нихже течение постничества совершил еси; к сих похвалению не довольни

сущe, любовью паче почитаем тя и верно ти сицевая приносим:

Радуйся, гладом и жаждою плоть твою удручивый.

Радуйся, всяко сладострастие всенощными бдении увядивый.

Радуйся, в молитвах и пощениях подвижавыйся и в безстрастие облекийся.

Радуйся, предивное воздержания зеркало.

Радуйся, яко, страждущей от мраза плоти твоей, теплотою любви Христовы согревашеся дух твой.

Радуйся, яко зноем опаляема тя роса божественных благодати прохлаждаше.

Радуйся, преподобных лику великая славо.

Радуйся, подвигов и совершенства образе достоподражаемый.

Радуйся, Сергие преподобне, Нуромский чудотворче.

Кондак 8

Странное и пачеестественное житие преподобнаго Павла видево, блаженне, был еси того спостник и собеседник: во обоих бо вас

бѣше един и тойжде дух, и сего ради два, яко един, текосте ко Господу, поюще: Аллилуиа.

Икос 8

Весь еси в вышних, но и нижних не оставляеши, преподобне отче Сергие, присно со Христом царствуеши, и от нас грешных молитвы к Нему возсылаеши: не точию бо припадающыя к цельбоносному твоему гробу, но и далече отстоящыя, призывающыя же всечестное имя твое, предстательством твоим соблюдаеши от всякаго зла. Темже во умилении зовем ти:

Радуйся, прибежище наше в скорбех.

Радуйся, пристанище наше во обстояниих.

Радуйся, целителю болезней душевных вкупе и телесных.

Радуйся, посетителю в немощех лежащих.

Радуйся, яко призываемый скоро на помощь предваряеши.

Радуйся, яко печали житейския от человек отъемлещи.

Радуйся, ангельскаго жития ревнителю.

Радуйся, ликом святых всех сопричастниче.

Радуйся, Сергие преподобне, Нуромский чудотворче.

Кондак 9

От всяких бед, скорбей и напастей избавляй нас, преподобне, твоими ко Господу многомогущими молитвами, и даруй нам и временная благая и вечное радование получитьи, да купно с тобою воззовем: Аллилуиа.

Икос 9

Витийство человеческое не возможет изрещи, како по мнозех летех преставления твоего иноку Никифору явился еси, глаголя: «Рцы игумену и братии, да очистят гроб мой, не хочет бо Господь ему в забвении быти». Мы же, благодарни суще Богу, даровавшему нам тебе Своего угодника, вопием ти сицевая:

Радуйся, подвижниче всеусерднейший, во врата райския вшедый.

Радуйся, и о спасении земных братий твоих пещися не престай.

Радуйся, гроб твой и тело твое, якоже сосуд благодати, нам оставивый.

Радуйся, от них струи исцеления изливати не прекращай.

Радуйся, Христовым словесем последователю, с Ним ныне на Небесех царствуй.

Радуйся, сеявый слезами, да с радостию рукояти твоя пожнеши во время свое.

Радуйся, пути жестоки за словеса устен Господа твоего сохранивый.

Радуйся, от первого и до едионадесятаго часа жизни твоея Ему точию единому служивый.

Радуйся, Сергие преподобне, Нуромский чудотворче.

Кондак 10

Спаستися хотяще вернии от грехов и страстей многообразных, отче, предстателя тя себе и поборника поставляют и не лишаются упования своего: наставляеши бо на спасения стези усердно к тебе притекающыя и Богу верно вопиющыя: Аллилуиа.

Икос 10

Стену тя заступника и молитвенника тепла обретше, преподобне, из глубины сердца, яко

благоуханное кадило, со воздыханием Богу
возсылаем хвалы: тебе же присному существу
молитвеннику, сицевая приносим пения:

Радуйся, плодов добродетельных
благопроцветшая ниво.

Радуйся, благочестивых душ преизрядное
украшение.

Радуйся, земным заступниче крепкий.

Радуйся, послушателю скорый притекающих
к тебе.

Радуйся, светильниче, мрак демонский
далече отреваяй.

Радуйся, душетленных недугов тму отгоняй.

Радуйся, яко многоразличная благодеяния
тобою свыше подаваема бывают.

Радуйся, яко всех моления дерзновенно
Вышнему приносиши.

Радуйся, Сергие преподобне, Нуромский
чудотворче.

Кондак 11

Пение всеумиленное Господеви воспевал еси
во вся дни жития твоего, преподобне,
непрестанно имя Христово нося во устнах и

сердце твоём: сего ради очистив внутренняго твоего человека, сликвник явился еси ангельским чином, с ними поя Вседержителю: Аллилуиа.

Икос 11

Светило явился еси светозарное, преподобне Сергие, во стране Вологодстей: светлостию бо жития и дел твоих и знаменьями чудес озаряеши души наша. Сего ради мы, притекающе к раце мощей твоих, глаголем ти таковая:

Радуйся, светлое солнце, блистании твоими просвещающее верных.

Радуйся, сосуде мира божественнаго, облагоухай припадающих к тебе со усердием.

Радуйся, во странах еллинских родивыйся, богохранимей же державе Российстей Богом данный.

Радуйся, северныя страны наша украшение велелепное.

Радуйся, граду Вологде похвало высокая.

Радуйся, храму, в немже почивают мощи твоя, утверждение непоколебимое.

Радуйся, благоукрашителю пустыни
Нуромския.

Радуйся, многия иноки пастырским жезлом
твоим ко Христу приведый.

Радуйся, Сергие преподобне, Нуромский
чудотворче.

Кондак 12

Благодать, данную ти и подвиги твоя
никтоже изреци возможет, отче Сергие: в
пустыни бо нестяжательно живый, с Богом и
ангелы беседовал еси, от человек бегая. Ныне
убо в Небесных Чертозах радуяся, поеши
Господу Богу: Аллилуиа.

Икос 12

Поем доблественныя подвиги твоя, ублажаем
достохвальную кончину твою, почитаем и
священную память твою, преподобне, в нейже,
яко единому от друзей Божиих, похвальная ти
сице вопием:

Радуйся, яко светлыми подвиги твоими ко
Свету Невечернему вшел еси.

Радуйся, яко со безплотными трисвятую
песнь немолчно взываеши.

Радуйся, неизреченных благ наследниче.

Радуйся, ликования во Царствии Небеснем присно наслаждаешься.

Радуйся, яко предстоиши во славе Пресвятей Троице.

Радуйся, яко в памяти твоей Христову Церковь веселиши неизреченно.

Радуйся, яко тобою постницы и пустынножитилие в подвизех укрепляются.

Радуйся, яко вернии благоправлением твоим по стопам заповедей Божиих шествовати научаются.

Радуйся, Сергие преподобне, Нуромский чудотворче.

Кондак 13

О великий и преславный угодниче Христов, преподобне отче Сергие! Приими сие малое от нас приносимое тебе пение, и потщися скоро умоли милостиваго Бога и Владыку, да твоим ходатайством избавит нас от враг видимых и невидимых, от всякия напасти и скорби, от внезапныя смерти и будущия муки, да с тобою и со всеми святыми сподобимся непрестанно пети Ему: Аллилуиа.

Этот кондак читается трижды, затем икос 1-й и кондак 1-й

Молитва 1

О великий чудотворче, преподобне отче наш Сергие! Услыши нас грешных молящихся тебе и имя твое святое на помощь призывающих, не презри нас чтущих тя: моли о нас грешных Содетеля нашего Господа Бога, тебе бо дадеся благодать молитися за нас. Не мним бо тя мертва суща: аще бо телом и преставился еси от нас, и рака твоя пред очима нашими видима есть, но святая твоя душа со ангельскими лики предстоит у Престола Вседержителя. О пастырю наш, преподобне отче Сергие! Потщися сохранить нас от пагубныя смерти и от бесовскаго искушения, умом от малодушия помраченных. Не остави нас, светильниче Христов, плененных быти, но помози нам молитвами твоими от вечныя муки избавитися и наследники Царствия Небеснаго быти со всеми святыми от века угодившими Господу Богу нашему Иисусу Христу, Емуже подобает честь, поклонение, слава и держава, со Безначальным Его Отцем и Пресвятым и Благим и

Животворящим Его Духом, ныне и присно и во веки веков. Аминь.

Молитва 2

О преподобне и достоблаженне отче Сергие, добрый наш пастырю и учителю! Ты еще на земли сей раб преискренний Спаса Христа показался еси, и многия дары благодатныя от Него прияти сподобился еси: по блаженнем же твоём успении Престолу неприступныя Его Славы предстоя, велие к Нему дерзновение имаши. Сего ради моли и о нас, влающихся в пустыни мира сего и сует его. Огради нас предстательством твоим от всех враг видимых и невидимых, от тлетворных ветр, смертоносныя язвы, от глада, труса, потопа, огня, меча, нашествия иноплеменных и от всякаго зла. Наипаче же, святче Божий, пролей теплое твое моление ко Господу о богохранимей державе Российстей, да в мире, тишине и благоденствии жительствуем. Моли, отче священный, Царя царствующих: страждущую страну Российскую от лютых безбожник и власти их Господь да свободит, и да возставит престол православных правителей; верных рабов Его, в скорби и печали день и ночь вопиющих к Нему,

многоблезный вопль да услышит и да изведет от погнбелн живот наш. Ограждай же моленнем твоим, преподобне, Церковь Христову Православную от ересей и расколов, ризу Христову раздрати тщащихся: испроси пастьрем святыню, пастве о спасенн ревность, старцем крепость и благое напутствие в жизнь вечную, средним лучшим быти, юныя уцеломудри и послушанн научи. Нам же всем, угодниче Божий, время на покаянне испроси, да не во гресех наших умрем, но да молитвами твоими, плоды достойны покаяннн принесшим, вечную присноблаженную жизнь и сопребыванне со святыми Его дарует нам Господь, да прославляем гласы немолчными Его неизреченное милосердие в безконечныя веки веков. Аминь.

